

NAQQIUT

Siunnersuut 2. august 2016-imeersaq taarserlugu

(Iluarsissummi taaguutip “tusagassiorfiit” atorneqarnera siunnersuutip kalaallisoortaani assigiissarneqarpoq).

Inatsisissatut siunnersuummut nassuiaatit

Nalinginnaasumik oqaaseqaatit**1. Aallaqqaasiut**

1.1. Siunnersuummut pingaernerutillugu tunuliaqutaasoq.

Naalackersuisut naqitatigut allatagigullu internetikkut nutaarsiassalerinermik, maannalu pisunik soqutiginaateqarsinnaasunik allaaserinnittartut sinniisaannik, maannamut tapiissuteqartarnikkut aaqqissuussaaneq pillugu oqaloqateqareerlutik, tapiissuteqartarnernut aaqqissuussinerit immikkut inatsisiliinikkut Inatsisartunik aalajangersaavigineqarnissaat pissusissamisoortutut isigivaat.

Aaqqissuussat maanna atuuttut nalunaarusiornikkut kulturikkut ingerlatsineq sunngiffimmilu tunngassutilinnik suliaqarnermut maleruagassat tunngavigalugit Naalackersuisunik aalajangersaavigineqarlutik aaqqiivigineqartarput. Inatsisit toqqammavigalugit atortussaaitaasup immikkoortuata 2a-p allaaserineqarnera innersuusutigineqarpoq.

Inatsisinngortinneqarluni aaqqiivigineratigut qulakkeerneqassaaq, tusagassiorfinnik tapiissusiisarnerup inatsisartutigoortumik aalajangersaavigineqarnera, taamaalillunilu inatsisartutigut aatsaat akuerineqartumik maleruagassanik allannguisoqarsinnaalissalluni. Tunngaviusumillu tusagassiorfinnut tapiissuteqartarnernut malittarisassat akuttunngitsumik allanngorartinneqartarnerisa pakkersimaarneqarnissaat qulakkeersimaneqarnerulissalluni. Tusagassiorfiit siunissamut ungasinnerusumut pilersaarusiorsinnaalernissaannik periarfissagissaartitsinerulissaaq, ilaliullugit sanaartoriaatsinik piorsaanissat.

Tamatigoortunik assigiinngisitaartunillu inuiaqatigiinnermut kulturimullu tunngassutilinnik tusagassisarnermik qulakkeeriniarnermik piorsaaniermillu siunnersuut siunertaqarpoq, aammalu tamat oqartussaaqataanerannik naalackersuinikkullu oqallinnermik kimittorsaaniarnermik siunertaqarluni.

Pisortatigoortumik tusagassiorfinnut tapiissuteqartarnissaq siunnersuutip taamaalilluni atituumik tusagassiorfitsigut nutaarsiassalerinermilu periarfissaqalernissaq sunniuteqarfigisussaallugulu qulakkeertussaavaa, nunalu tamakkerlugu qanigisamilu tusagassiorfiit ataasiakkaat assigiinngitsullu akornani tamatigoortuunissaq qulakkeertussaallugu. Pisortatigoortumik tapiissusiinerup, saqqummiussat imarisamikkut amerlasuunut tulluarsagaanissaat tamatigoortuunissaallu siuarsarlugulu ikorfartortussaavaa. Aaqqissuussaq tusagassiorfinnut ikiorsiisarneq, suliat

iluarsartuullugit pilersaarusiatic ingerlanneqarnerinut ikiorsiissutitut, sanaartornermullu tapiissutigineqartartunut maanna atuuttunut imarisamigut ingerlatitseqqiinnerulluni tungaveqarpoq.

1.2. Inatsisiliornermi najoqqutat pingaarnerit

Naalackersuisoqarfiup inatsimmut piareersaasiiornermi tusagassiorfiit sinniisaat attaveqatigisimavaat, taamatuttaaq junimi 2015-imi tusagassiutit pillugit paasiniaaqatigiinnermi tusagassiorfinnut assigiinngitsunut attuumassuteqartut oqaloqatigineqarput. Aammalu tusagassiorfinniik isummersuutigineqartut, nalunaarusiat marluusut inatsimmut uunga toqqammaviusut ilusilersornerini eqqarsaasersuutitut ilaliunneqarsimallutik.

1.3. Siunnersuutip imarisaasa nalinginnaasumik pingaarnersiorneqarnerat

Siunnersuutip aalajangersaavigivaa, Naalackersuisut tusagassiorfinnut tapiissuteqarsinnaasut sulianut iluarsartuullugit pilersaarusiatic ingerlatanut tapiissusiinikkut imaluunniit ingerlatsinermut tapiissusiinikkut. Siunnersuutip nassuiaaserpaa, tapiissuteqariaatsit marluusut qanoq paasineqassanersut. Siunnersuutip aamma aalajangersarpaa, aningaasanut inatsimmi aalajangersaanikkut aningaasaliissutit tapiissutigineqartut sulianut iluarsartuullugit pilersaarusiatic ingerlatitseqqiinnermut tapiissutitut imaluunniit ingerlatsinermut tapiissutitut tunniunneqartassasut, aammalu sulianut iluarsartuullugit pilersaarusiatic tapiissusiisarnernut aqqissuussaq naapertorlugu aningaasat tapiissutaasut atunngitsuukkat, ingerlatsinermut tapiissusiisarnermik aqqissuussamut nuunneqarnerisigut tunniunneqarsinnaangussasut.

Tusagassiorfiit sorliit tapiissutinik pisinnaatitaanersut aamma aalajangersarneqarpoq.

Tapiissuteqarnermut aqqissuussinerni marluusuni tapiiffigineqarnissamut piumasaqaatit ataatsimoortut immikkoortullu aalajangersarneqarput.

Kiisalu tapiissuteqarnermut aqqissuussinerni marluusuni ilanngullugu aalajangersarneqassaaq, aqqissuussinerni tamarmik immikkuutitaarlutik atuuffissaat, tapiissutinillu tunniussinissamut kina aalajangiisuussanersooq. Tamatuma saniatigut ilanngunneqarput qinnuteqarnermut periusissiaq, naatsorsuutinik kukkunersiorneqarnissaannillu piumasaqaatit, pisortaqarnermut tunngasut, nakkutilliinermut tunngasut kingunerititallu.

Allannguutit annikitsunnguit eqqaassanngikkaanni, tapiissuteqartarnermik aqqissuussanut marlunnut maanna atuuttuusunut, siunnersuut imarisamigut assinguvoq. Tamanna pillugu siunnersuummi qulequttat pingaarnerit allaaserineranni imm. 2b innersuutigineqarpoq.

2. Siunnersuummi immikkoortut pingaarnerit

a) Inatsit atuuttoq

Inatsit atuuttoq tassaavoq Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaat nr. 10, 21. maj 2002-meersaq, taannali atorunnaarsinneqassaaq 1. januar 2017, Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaata nr. 5, 6. juni 2016-imeersup atortuulerneratigut. Saniatigullu malittarisassat atuuttut aamma aalajangersagaapput tusagassiutinut tapiissuteqartarneq pillugu Namminersorlutik Oqartussat nalunaarutaat nr. 19, 8. oktober 2015-imeersaq aamma Nuna tamakkerlugu tusagassiutinut naqitanut ingerlatsinermut tapiissuteqartarneq pillugu Namminersorlutik Oqartussat nalunaarutaanni nr. 10, 26. maj 2016-imeersumi.

Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaanni nr. 10, 21. maj 2002-meersumi takuneqarsinnaavoq, Naalakkersuisut kommunalbestyrelsili atuagassianut tapiissuteqarsinnaasut, tassani pineqarlutik aviisiliornermik atuagassialerinemillu suliallit qanigisami imaluunniit nuna tamakkerlugu naliginnaasumik kulturikkut inuiaqatigiinnut paasissutissiisarnermik siuarsaallutik suliniuteqartunut. Peqqussutip § 31-mi aalajangersagaavoq kulturikkut inuiaqatigiinnut paasissutissiisarnermik suliniuteqartunut tunngasunik maleruagassianik Naalakkersuisut aalajangiisnaasut.

Tusagassiorfinnut tapiissuteqartarneq pillugu nalunaarusiami ersippoq, tapiissutit sulianut ingerlatanut allatatigut internettetikkullu inuiaqatigiinnut paasissutissanik ingerlatsisunut, tamat oqartussaaqataanerannik, tusagassiutitigullu tamatigoortumik ingerlatalinnut, siuarsaatit tunniunneqarsinnaasut. Tusagassiorfinnut arlaannaanulluunniit attuumassuteqaratik nutaarsiassanik soqutiginaatilinnillu kalaallinut atuartartunut suliaralugit naleqqussakkanik, imaluunniit nunani allani pisunik kalaallinut naleqqussarlugit sulianik, naqiterlugit imaluunniit internetikkut sulianik saqqummiussassanik aallarnisaasunut inerisaasunullu tapiissusiisoqarsinnaavoq.

Suliat iluarsartuullugit pilersaaruserlugit ingerlatat tapiiffigineqarnissaannut arlalinnik piumasagaasersuisoqarsimasooq nalunaarusiami allassimavoq, ilaliunneqarsimalluni tusagassiorfiit suliffeqarfinnik pisortanik pigineqarlutik imaluunniit piginneqataaffigineqarlutik ingerlanneqartut, imaluunniit suliffeqarfinnik pisortanik aningaasalersorneqartunik pigineqartut piginneqataaffigineqartulluunniit, assingusumilluunniit inissisimasut tapiissuteqarfigineqarsinnaanngitsut. Ilanngullugu tapiissutit 70%-imut killilerneqarsimapput, tusagassiorfiit namminerisaminnik aningaasarsiorsinnaassuseqarnissaat qulakkeerniarlugu.

Nalunaarusiami piumasagaataavoq, tusagassiorfik tapiiffigineqassaguni namminersortuulluni tusagassiorfiussasoq. Qulakkeerumallugu tusagassiorfik tapiissuteqarfigineqartoq, nutaarsiassalerinermik naammaginatarmik pitsaassusilimmik, inuiaqatigiit pisariaqartitaat naapertorlugit tunniussaqaarsinnaasumik suleqatigiiffiusumik aaqqissuisoqarfeqarluni toqqammaveqarnissaa, aalajangerneqarsimavoq tusagassiorfik tapiiffigineqarsinnaassaguni, aaqqissuisoqarfimmi minnerpaamik pingasunik ukioq naallugu akissarsiaqartunik sulisoqassasoq, akisussaalluni aaqqissuisooq ilanngullugu.

Nalunaarusiaq ataatsimiititaliamut tapiissutinik agguaaasisartuusumut aamma maleruagassartaqarpoq. Ataatsimiititaliaq qinnuteqaatinik suliarinnittussaavoq, tapiissutinillu agguaaassinissamik aalajangiisuussalluni. Ataatsimiititaliap katiterneqarnera, atuunnerata sivilissusaa, inatsisitigut aaqqissuussaanera, allattoqarnikkut malitassaak akissarsiaqartitsinerlu nalunaarusiami maleruagassat ilusilerpaat.

Nalunaarusiaq sulianut iluarsartuullugit pilersaarusiorluni ingerlatassanut tapiissutinik qinnuteqaateqarnut periusissanut, naatsorsutinik piareersimasassanut kukkunersiuinermullu tunngasunik maleruagassartaqarpoq, ilaliullugu piumasaqaataavoq naatsorsuutit kukkunersiuusumik kukkunersiuusutut akuerisamik kukkunersiorneqarsimanissaat, 150.000 kr.-it sinnerlugilluunniit tapiissutigineqassappata.

Kiisalu nalunaarusiami, aqutsisoqarnermut, nakkutilliinermut kinguneqartitsinermullu tunngasunik maleruagassartaqarpoq. Tapiissutigineqartut, nalunaarusiallu malittarisassaasa eqqortumik atornerarneri agguaaasinermi ataatsimiititaliap nakkutilliisussaataaffigivai. Ataatsimiititaliaq piumasaqaatit ersarissakkat naapertorlugit tapiissutinik tunniussinissamik unitsitsisinnaatitaavoq imaluunniit tamakkiisumik ilaannakortumilluunniit utertitsinissamik piumasaqarsinnaatitaavoq.

Nalunaarusiami maanna atuuttuusumi ersippoq, tusagassiorfinnut arlaannaanulluunniit attuumassuteqanngitsunut naqitikkani nuna tamakkerlugu saqqummersitsisartunut ingerlatsinermut ukiumoortumik tapiisuteqartoqarsinnaasoq.

Nalunaarusiami tapiissutinik tunniussisarneq pillugu arlalinnik piumasaqaasiortoqarpoq, ilaliullugu tusagassiorfiup nuna tamakkerlugu saqqummiisarnissaa, sapaatit akunnerannut ataasiarluni saqqummersartuunissaa naqitatullu isikkoqarnissaa piumasaqaatigineqarluni. Tusagassiorfiit pisortat suliffeqarfiutaannik pigineqartut piginneqataaffigineqartullu imaluunniit suliffeqarfiit pisortatigoortumik aningaasalersorneqartut assingusumilluunniit inissisimasut tapiissuteqarfigineqarsinnaanngillat.

Nalunaarummi piumasaqaataavoq, tusagassiorfik tapiissuteqarfigineqarsinnaassaguni namminersortuusariaqartoq. Tusagassiorfiup tapiissuteqarfigineqarsinnaasut inissisimanissaa qulakkeerumallugu aalajangerneqarsimavoq, tusagassiorfik nutaarsiassalerinermik naammagintumik pitsaassusilimmik, inuiaqatigiit pisariaqartitaat naapertorlugit tunniussaarsinnaasumik suleqatigiiffiusumik aaqqissuisoqarfeqarluni toqqammaveqassasoq, aalajangiivigineqarsimavorlu tusagassiorfik tapiiffigineqarsinnaassaguni aaqqissuisoqarfimmini minnerpaamik pingasunik ukioq naallugu akissarsiaqartunik sulisoqassasoq, aaqqissuisuuneq ilanngullugu.

Ilaliullugu naatsorsuutininut tunngasut, qinnuteqaateqarnermut periutsinut, tapiissuteqaatinillu tunniussinermit maleruagassat nalunaarummut ilanngunneqarput. Naatsorsuutinik kukkunersiuisumit uppernarsarneqarlutik akuerineqartunik, assigisaannillu nassiussinerit kingusinnerpaamik qinnuteqaatinik nassiussinernut peqatigitinneqassapput. Ingerlatsinermit tapiiffigineqarnissamut ukiumut ataasiarluni qinnuteqartoqarsinnaavoq, akuersissutillu katinneqarnerat tamakkiisumik aningaasanut inatsimmut ilanngunneqartassapput, maleruagassat naapertorlugit minnerpaamik qinnuteqartumut ataatsimut tapiissuteqaatinik tunniussisoqarsinnaalerpat.

b) Siunnersuut

Siunnersuutip annersaa maleruagassanik atuuttooreersunik ingerlatseqqinnermik imaqarpoq.

Aningaasartuutissanut inatsimmi tapiissuseeriaatsit marluusut tamarmik immikkut kontoqalernissaannik aalajangersaaneq nutaartaavoq, aningaasallu sulianut iluarsartuullugit pilersaarusiortuluni ingerlatanut tapiissutaasut atunngitsoorneqartut, ingerlatsinermit tapiissuteqartarnermik aqqiissuussamut nuunneqarlutik tunniunneqarsinnaalissallutik. Aningaasat agguagassat aappaat tassaassapput tusagassiuutininut minnerpaamik sapaatip akunneranut ataasiarlutik saqqummersartunut tapiissutit. Aningaasat agguagassat aappaat tassaassapput tusagassiuutininut sapaatip akunneranut ataasiarlutik akuttunerusumik minnerpaamilli qaammammut ataasiarlutik saqqummersartunut tapiissutit. Ingerlatsinermit tapiissutit tusagassiuutit ataasiakkaat ukiumi tapiissuteqarfiusumi aningaasat agguagassat iluanni saqqummersitat tapiiffigineqarsinnaatitaasut amerlassusaannut tamarmiusunut sanilliullugu tapiissuteqarnissamut piumasaqaatinik eqqortitsilluni ukiumi tapiissuteqarfiusumi saqqummersitaasa amerlassusaat tunngavigalugu agguarneqartassapput.

Aningaasaliissutit tamarmiusut qinnuteqartuni minnerpaamik ataasiinnarluunniit tapiissuteqarnissamut piumasaqaatinik eqqortitsippat atugassanngortinneqartassapput.

Siunnersuutigineqarportaaq, sulianut iluarsartuullugit pilersaarusiortuluni ingerlasunut tapiissusiisarnernut maleruagassami maanna atuuttumi, tusagassiorfik minnerpaamik ukiuni pingasuni ingerlareersimassasoq piumasaqaammit, qinnuteqartup ukiumi qinnuteqarfiusumi suliffeqarfini aallarnisarpagu, piumasaqaammit atuutsitsinngitsoorfiusinnaanera ingerlatsinermit tapiissuteqarnermut aamma atuutsinneqassasoq.

3. Pisortanut aningaasaqarnikkut allaffissornikkullu kingunissai

Siunnersuutip aningaasaqarnikkut allaffissornikkullu pisortaqaarfinnut kinguneqarnissaa ilimagineqanngilaq, pissutigalugu siunnersuutip imarisaasa annersaat maleruagassanik pioreersunik ingerlatsitseqqinnerummata.

4. Inuussutissarsiortunut aningaasaqarnikkut allaffissornikkullu kingunerisassat

Inatsisit atuuttut malillugit ingerlatsinermut tapiissutit taamaallaat tusagassiorfinnut sapaatip akunneranut ikinnerpaamik ataasiarluni naqitatigut saqqummersitsisartunut tunniunneqarsinnaapput. Siunnersuummi akuttussuseq allangortinneqarpoq, taamaalilluni tusagassiorfinnut qaammammut ikinnerpaamik naqitatigut ataasiarluni saqqummersitsisartunut tapiissutit tunniunneqarsinaalerlutik. Qinnuteqartut qassiuneri apeqqutaallutik suliffeqarfiit ilaat malittarisassat atuuttut malillugit annikinnerusumik tapiissuteqarfigineqarsinnaassapput, matumani ingerlatsinermut tapiissutinut aningaasaliissutit amerlassusaat allangorsimangippata. Paarlattuanik suliffeqarfiit amerlanerit ingerlatsinermut tapiissutinik tunineqarsinnaanerit siunnersuutikkut ammaanpeqassaaq.

5. Avatangiisinut, pinngortitamut innuttaasullu peqqissusaannut kinguneri

Siunnersuut avatangiisinut, pinngortitamut innuttaasullu peqqissusaannut kinguneqanngilaq.

6. Innuttaasunut kinguneri

Siunnersuut innuttaasunut kinguneqanngilaq.

7. Pingaarutilittut kinguneqaataasinnaasut allat

Kinguneqaataasinnaasoqanngilaq.

8. Oqartussaasut kattuffillu tusarniaaffigineqarnerat

26. maj 2016-imiit 30. juni 2016-imut siunnersuut tusarniaavigisassanut ukununga tusarniaassutigineqarpoq:

Naalakkersuisut Siulittaasuata Naalakkersuisoqarfia, Ineqarnermut, Sanaartornermut Attaveqaqatigiinnermullu Naalakkersuisoqarfik, Aningaasaqarnermut Naalakkersuisoqarfik, Aatsitassanut Ikummatissanullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Inuussutissarsiornermut, Suliffeqarnermut Niuernermullu Naalakkersuisoqarfik, Ilaqtariinnernut, Naligiissitaanermut Isumaginninnermullu Naalakkersuisoqarfik, Peqqissutsimut Naalakkersuisoqarfik, Pinngortitamut, Avatangiisinut Inatsisinillu Atortitsinermut Naalakkersuisoqarfik, Nunanullu Allanut Pisortaqarfik, KNR, Kulturministeria, NUSUKA, Kalaallit Nunaanni Sulisitsisut, SIK, Tusagassiorlut Peqatigiiffiat, Atorfillit Kattuffiat, Lokalradiut aamma lokal Tv-it peqatigiiffiat, Sermitsiaq AG, Atuakkiortut Peqatigiiffiat, Oqaasileriffik, Ilisimatusarfik, Iglo Magazine, qeqqa.gl aamma Q-offset.

Tusarniaanermut atatillugu akissutinik ukunanga tigusaqartoqarpoq:

Naalakkersuisut Siulittaasuata Naalakkersuisoqarfia, Aalisarnermut, Piniarnermut Nunalerinermullu Naalakkersuisoqarfik, Ilaqtariinnernut, Naligiissitaanermut Isumaginninnermut Inatsisinillu Atortitsinermut Naalakkersuisoqarfik, Aningaasaqarnermut Naalakkersuisoqarfik, Sermitsiaq AG aamma Kalaallit Nunaanni Sulisitsisut.

Tusarniaanermut akissutigineqartut aamma siunnersuutip inatsisit teknikkiisigut misissuataarneqarnera pissutissaqartitsisimavoq siunnersuummi ataasiakkaatigut allannguinnissamut. Taamaasilluni siunnersuummi § 1, imm. 4-mi killiliisoqarsimavoq, tassani oqaaseqatigiit kingullit peerneqarmata. Siunnersuummi § 18-imi imm. 1 aamma imm. 2 allannguuteqarput (sinnaavoq) sinnaavutut aalajangersagannortinneqarami. Kiisalu piumasaqaat qinnuteqaatip allaganngorlugu suliarineqarnissaanik, aamma qinnuteqartup aningaaserivimmi konto-minik ilisimatitsisussaanerata atuuffia annertusineqarpoq suliniutinut tapiiffigineqarnissamik qinnuteqaatinut aamma atortuulersillugu.

Tamatumalu saniatigut ataasiakkaatigut allannguinnernik aamma erseqqissaanernik oqaaseqaatini allannguisoqarpoq.

Tusarniaanermut akissutit ataasiakkaat tusarniaanermut akissutit pillugit allakkiami ilanngussatut 1-itut ilaasumi oqaaseqarfigineqarput.

Inatsisissamut siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-imut

Aalajangersakkami, tusagassiorfinnut tapiissuteqaateqarnerit qanoq ililluni inatsit naapertorlugu tunniunneqarsinnaasut aalajangersaavigineqarpoq. Aalajangersakkamut tunuliaquttat siunertallu paasilluarneqarnissaannut siunnersuummut immikkoortortat pingaarnert takunissaat innersuutigineqassaaq.

Oqaasertaliussaq ”tamanna pillugu qinnuteqaateqareernikkut tusagassiorfinnut tapiissuteqartoqarsinnaavoq” imatut paasineqassaaq, qinnuteqaateqartoqarneratigut taamaallaat tapiissuteqarfigitittoqarsinnaasoq. Oqaaseqatigiinni passiv form-ip atorneqarneranut peqqutaavoq, tapiissuseeriaatsini marluusuni tapiissuteqaatit assigiinningsunik marluusuniik tunniunneqartussaammata, tassa tapiissutinik agguassineranut ataatsimiititaliap sulianut iluarsartuullugit pilersaarussianut ingerlatassanut tapiissuteqaatit tunniuttussaammagit, Naalakkersuisunillu ingerlatsineranut tapiissuteqaatit tunniunneqartussaallutik.

Imm. 2-mut

Aalajangersakkami, sulianut iluarsartuullugit pilersaaruserlugit ingerlatassanut tapiissuteqarneq qanoq paasineqassanersoq aalajangersaavigineqarpoq.

Iliuutsit suliallu qinnuteqaateqartup pilersinniagai aallarnisarniagaalu aalajangersakkami ilaapput.

Suliniutip piffissami aalajangeriikkami naammassineqarsinnaanissaa piumasarineqarpoq, qinnuteqaatillu tunniunneqarnerata nalaani piareersareernejarsimassalluni naammassineqaruni isikkussarisaa ersereerluni.

Imm. 3-mut

Aalajangersakkami, ingerlatsineranut tapiissuteqarnej qanoq paasineqassanersoq aalajangersaavigineqarpoq.

Naliginnaasumik ingerlatsineranut aningaasartuutunik nalunaarsuineq tamakkiisuunngilaq. Ulluinnarni ingerlatsineq, iluarsartuussilluni pilersaarusiortluni suliniutinut suliffeqarfimmut naliginnaasumik ilaanngitsunut illuatungiusutut isigineqassammata.

Imm. 4-mut

Tusagassiorfinnut tapiissuteqartarnermik aqqissuussap aningaasalersorneranut toqqammaviusoq nalunaarusiap erseqqissarpaa. Tassaallunilu manna tikillugu Nunatta Karsia, aningaasaqarnermut inatsimmi akuersissuteqarnikkut aalajangersaavigineqartartoq.

Aalajangersakkap piumasaqaatitarivaa, marlunnik immikkoortunik akuersissuteqartoqartassasoq, tapiissuteqarnermut aqqissuussanut marlunnit immikkoortunut toraagalinnik. Tamatumunnga peqqutaavoq, Inatsisartut aningaasaqarnermut inatsimmik akuersissuteqarnerisigut aqqissuussanut marluusunut aningaasat atornejartussatut akuerisat qanoq annertussuseqarnissaasa aalajangiivineqartarnissaat tulluurtutut isigineqarmat.

§ 2-mut

Imm. 1-imut

Aalajangersakkap, tusagassiorfiit qanoq ittuusut inatsit naapertorlugu ikiorsiivigineqarsinnaanersut aalajangersaavigivaa. Aalajangersakkamut tunuliaquttat siunertallu paasilluarnejarnissaat pillugu siunnersuummut immikkoortortat pingarnerit takunissaat innersuutigineqassaaq. Aalajangersakkap immikkuualuttortaasa paasilluarnejarnissaannut nassuiaatit imm. 2-miik 5-imut innersuutigineqarput, tassani immikkuualuttut ataasiakkaat nassuiaatigineqarmata.

Aalajangersakkap immikkoortuanut kingullermut peqqutaavoq, inuit aalajangersimasumik amerlassusillit tusagassiummik pisisartut pisisartunngortussalluunniit imaluunniit atuisut atuisuulerumaartulluunniit Kalaallit Nunaannut kalaallilluunniit kulturiannik ilisamasaqareertussaasut kissaatigineqarmat. Taamaammat tusagassiorfiup allaaserisat assinullu sulianut attuumassuteqartut allat toqqartornerisigut, katiternerisigut, naleqqussarnerisigut ataatsimoortunngorlugillu suliarinerisigut imarisamikkut inunnut saqqummiiviginiakkanut

taakkununga naleqqussagaanissaat naatsorsuutigineqarpoq. Tusagassiorfiup nunani allani pisunik inunnut saqqummiivigisassanut imarisamikkut naleqqussaasarnissaat aalajangersakkap piumasaaqatitarivaa.

Imm. 2-mut

“namminerisaminik aqqissuisuuneqarfeqarpat” paasineqassaaq, tusagassiorfimmuut attuumassuteqarlutik atorfeqartut eqimattaallutik tusagassiorfiup pineqartup aqqissuisoqarfiinnaani allamik suliaqaratik aqutsisut.

Imm. 3-mut

Nr.1-imi killiliinertut aalajangerneqartoq piginnittuussutsumik ilusileeriaatsinut tamanut atuuppoq, ilaliullugu toqqaannangikkaluamik piginnittuuneq, soorlu pisortatigut oqartussaassuseqartut, suliffeqarfiit imaluunniit suliffeqarfiit pisortanik aningaasalersuiffigineqartut assigisaallu tamakkiisumik ilaannakortumilluunniit tusagassiorfimmik piginnittuuppata.

Suliffeqarfik pisortanik aningaasalersugaasutut isigineqassaaq, ingerlatsinermut tamakkiisumik aningaasartuutaasa 50%-ii sinnerlugilluunniit pisortanik tapiissutaappata. Aningaasalersueriaatsit assigiinngitsut pillugit qajassuussisoqarsinnaavoq, suliffeqarfiup pisortanik pigineqarnera imaluunniit ingerlatsiviup pisortanik aningaasalersugaanera ersarippat.

Aalajangersagaq nr. 2-miittoq aalajangiunneqarsimavoq soqutigisanut immikkut ittunut attuumassuteqannginnissaq qulakkeerniarlugu.

Killiliussa q piginnittuunermik aqqissuuseriaatsinut tamanut atuuppoq, soorlu toqqaannangitsumik piginnittuunerit, tusagassiorfiup affaa sinnerluguluunniit sulisitsisumik, sulisumik, branchemik soqutigisaqaqatigiiffinnilluunniit pigineqartillugu, tassungalu politikikkut partiit ilaapput.

Imm. 4-mut

”saqqummiussat assingusut” isumaqarpoq, saqqumiussat assilineqarlutik pappiaqqatigut amerlasuunngortitat akuttunngitsumillu saqqummersinneqartartut.

Imm. 5-imut

”tusagassiutit internetikkoortut” isumaqarpoq, tusagassiutit internetikkut nittartakkatigut saqqummersitsisartut.

”annikinnerusumik” imatut paasineqassaaq, assit nipillu tusagassiutip saqqummersitamini annerusumik atussanngimmatigut, kisiannili saqqummersitanut ilanngunneqarsinnaallutik.

§ 3-mut

Imm. 1-imut

Tapiissuteqartarnernut marluusunut piunasaqaatit ataatsimut atuuttut aalajangersakkami erseqqissaatigineqarput.

Nr. 1-mi angerlarsimaffimmik oqartoqarneranut paasineqassaaq, illoqarfik nunaqarfilluunniit tusagassiorfiup najukkatut nalunaarsorneqarfia. Kalaallit Nunaanni angerlarsimaffianik oqartoqarneranut pingaarnertut tangertarivaa, tusagassiorfiup Kalaallit Nunaanni aalajangersimasumik niuerniarfeqarnissaa. Taamatuttaaq Kalaallit Nunaanni eqqartuussivitsigut suliasannngortitsisoqarsinnaavoq tamakkiisumillu akileraartussaatailluni. Tusagassiorfik sumiiffinnut arlariinnut nalunaarsorneqarsimaguni, tusagassiorfiup pingaarnermik allaffeqarfigisaa angerlarsimaffiatut isigineqassaaq.

Nr. 2-mi pingaartinneqarpoq, aqqissuisoqarfik piffissaq tapiissuteqarfineqartoq tamakkerlugu akisussaasumik aqqissuisoqassasoq, aqqissuisoqarfiup ataatsimoorussamik suleqatigiiffiunerani tusagassiorfiup nutaarsiassalerinikkut imarisaanut inummik ataatsimik akisussaasoqassammat.

Nr. 3-mi aalajangersarneqarpoq aqqissuisoqarfik aalajangersimasumik amerlassusilinnik sulisoqassasoq. Nalunaaquttap akunnerisa suliffiusut katinneqarnerat minnerpaamik ukiumut suliffiit pingasut amerlaqataannik sulisoqassaaq, aqqissuisuuneq ilanngullugu, qinnuteqartup suliffik ukiumi qinnuteqarfiusumi imaluunniit ukioq qinnuteqarfik sioqqullugu pilersissimangippagu.

Ukioq naallugu suliffeqartuusut katinneqarnerini akissarsiaqarlutik imarisanillu suliaqartut ilanngunneqassapput, akissarsiaqarlutik suliffimmi sungiusartut ilanngullugit, tusagassiorfimmilu pilersitsisinnaassuseqarluni saqqummersitassanik inaarsaanermik aqqissuisoqarfimmi pingaarnertut suliaralugu aqutsisut. Ajornartinneqassanngilaq, ukioq naallugu inummut ataatsimut suliffissarititaasut suleqataasunut amerlanerusunut agguataarneqarsinnaanerata, taamaallaat suleqataasunik akunnerit suliffigisaasut katinneqarnerata minnerpaamik piffissaq tamakkiullugu atorfinnut pingasunut nallersuunneqarsinnaappat. Aamma pisariaqavinnngilaq akisussaalluni aqqissuisup piffissaq tamakkerlugu aningaasarsiaqarluni sulisuunissaa, aqqissuisoq suleqataasullu aamma taamatut ullup ilaannaa suliffeqarsinnaammata. Imitsillutilli sullissisartut (freelance) ukioq naallugu suliffinnut pingasuusunut ilaatinneqanngillat.

Minnerpaamik ukioq naallugu pingasunik sulisinnaasunik sulisoqartussaananermik piunasaqaat oqilisaasoqarnissaa pissusissamisoortut isigineqarpoq, suliffeqarfiup aallarnisarneqarnerata nalaani, tusagassiorfimmik pilersitsineq annertuallaanik aallaqqaatissatut aningaasaliiffigineqartariaqarsinnaammat.

Nr. 4-mi aalajangersarneqarpoq, tusagassiorfiup pineqartup tamakkiisumik imarisaasa ilai aalajangersimasumik annertussusillit tusagassiorfimmut tassungarpiq immikkut namminersuutigalugit sanaartorlugit tusagassiuserinikkut sulisassasut. Piunasaqaammi

annertussusilerneqarput, saqqummersartumi tassanerpiaq tamanut takusassianngorlugit saqqummersitassat aaqqisuisoqarfimmi suliarineqartut, minnerpaamik affai immikkut namminersuutigalugit tusagassiuserinikkut sanaartorlugit suliaanissaat.

”Immikkut namminersuutigalugit tusagassiuserinikkut sanaartorlugit suliat” isumaqarpoq, tusagassiorfiup isumaqatigineratigut, tusagassiorfik aqcutigalugu saqqummiussinikkut tusagassiorfiullu aningaasarsiaqartitsineratigut suliat. Sanaartornerullu aallarnisaaviginera piviusunnigortinneralu tusagassiorfimmi suliarineqassaaq imaluunniit tusagassiorfimmik sullissinikkut pissalluni.

Akerlianillu, nutaarsiassaqtitsiviit saqqummiussaannik nikisinnagit atuneq annikitsumillu naleqqussaalluni aaqqissuineq, assersuutigalugu, immikkoortortanik nikisiterineq, assilluunniit annertussusaannik allannguinerit, nalunaarsuutinik atuinerit, tegneserienik pisianik atuinerit, oqallisissiatut ilanngussanik allanillu atuinerit immikkut namminersuutigalugit tusagassiuserinikkut sanaartorlugit aaqqisuisoqarfitsigoortumik suliatut aaqqissuussatut isigineqassanngillat.

Tusagassiorfiit nutaarsiassaleralutik internetikkut nittartakkatigut saqqummersartut, atuisut oqallinnermikkut pilersitaannik imaqarisaminnut ilanngussuisarneri naliginnaavoq, tamatumani blogitigut saqqummiussukkanik, atuartartut tusagassiorfiup imarisaanut oqaaseqaateqarlutik allaaserisarisannik killilersugaannginnerusumik oqallisiginnillutik allaaserisannik tusagassiorfiit atuisarnertik ileqqorivaat. Tamakkua aatsaat immikkut namminersuutigalugit tusagassiuserinikkut sanaartorlugit suliatut isigineqassapput, tusagassiorfimmi pineqartukut saqqummiussassatut bloggerimik aalajangersimasumik akissarsiaqartitaalluni tusagassiorfimmuut attuumassuteqarluni suliarineqarpata.

Nr. 5-imi siunertarineqarpoq, tusagassiorfitsigut amerlanerit soqutigisaannik ingerlatsisuunissamik qulakkeersimaarinninnissaq, inuiaqatigiinnilu eqimattat ataasiakkaat soqutigisaannik ingerlataqannginnissaq. Tusagassiorfiup atuisut amerlasuut sammisarisinnaavai, assersuutigalugu pingaarnertut aalisarnermi pissutsit inuiaqatigiinnut atatillugit sammisarigunigit, illuatigulli tusagassiorfiit aalisarnermi inuussutissarsiornermi atortorissaarutaanerusunut tunngassutilinnik imarititaqartuusut, amerlasuunut sammisaqartutut isigineqassanngillat. Tusagassiorfiup amerlasuunut saaffiginnittuunera piviusorsiorlumik nalilersuinerimik tunngaveqartariaqassaaq.

Aalajangersakkami nr. 6-imi toqqammavigineqarpoq kalaallit oqaasii pisortatigoortumik oqaaserineqarmata, taamaattumillu saqqummersitat minnerpaamik kalaallisut piviusunnigortinneqartassallutik. ”Minnerpaamik” isumaqarpoq saqqummersitani oqaatsit allat aamma ilaliullugit piviusunnigitsisoqarsinnaasoq.

Imm. 2-mut

Aalajangersakkap, tapiissutigineqartut piumasaqaatitalerneqarsinnaanerinik periarfissiissuteqarneq aalajangersarpaa. Atugassarititaasut sulianut ingerlatassanut tapiissuteqartoqarneratigut,

agguaassinermut ataatsimiititaliamik aalajangerneqassaaq, ingerlatsinermullu tapiissuteqarnermi Naalakkersuisut aalajangiissallutik.

Atugassarititaasut siunertamut tapiissuteqarfigineqartumut attuumassuteqarluinnartariaqarpoq.

§ 4-mut

Aalajangersakkap aalajangersimasumik oqaatigaa, sulianut iluarsartuullugit pilersaarussianut ingerlatassanut tapiissuteqaateqartarnermi pingaarnerutillugu naliginnaasumik inuiaqatigiissutsimut tunngassutilinnik ilisimasariaqakkanik siuarsaanisaaq siunertarineqartoq. Naliginnaasumik inuttaasunik qaammarsaaneq inooqatigiinnermi naleqartitani annertuumik pingaaruteqartinneqarpoq, inuiaqatigiinnilu paasisutissanik ingerlatitseqatigiiffiusuni toqqammaviulluinnartuulluni.

Siunertarineqarporlu suliap iluarsartuullugu pilersaarusiap pilersitaasa imarisai tunuliaqutaralugit inuit akunnerminni killilersugaanngitsumik isummersoqatigiissinnaalernissaat anguneqassasoq. Suliarlu iluarsartuullugu pilersaarusiaq aamma tamatigoortuunissamut ilapittuutaasinnaavoq, inuppassuarnut tusagassiisarnep inuttaaqataasunut amerlasuunut paasisimasaqassutsimik tunniussaqaarsinnaanera eqqarsaatigalugu.

§ 5-imut

Imm. 1-imut

Suliamik iluarsartuullugu pilersaarusiamik aallarnisaanissamut imaluunniit suliamik piorsaanissamut sulianut ingerlatassanut tapiissutit tunniunneqarsinnaasut aalajangersaavigineqarpoq. Imm. 2-mi 3-milu ersarinnerusumik tapiissuseeriaatsit marluk qanoq paasineqassanersut aalajangersaavigineqarpoq.

Imm. 2-mut

Pilersitsiniarnernut tapiiffiginnittarnerup qulakkeerniartussaavaa, tusagassiorfinnik nutaanik pilersitsiniarnerup piorsaarnerullu nukittorsarneqarnissaata ukkatarineqarnissaa. Pilersitsiniarnernut tapiissuteqartarnerup niuerfimmuut iserniarnermi akimmisaarutaasinnaasut millisarsinnaavaat, aallarnisaanialeqqaallu isumassarsianik periarfissanillu nutaaliornertalinnik misileraasinnaanermik periarfissittarlugit.

Pilersitsiniarneq, pilersitsilluni timitaliinermik aallarnisaataasumillu sanaartornermik paasineqassaaq. Aalajangersakkami, tusagassiorfinnik nutaarsiassalerinermik inuiaqatigiinnullu soqutiginaatilinnik suliaqartunik pilersitsiniarnerit pineqarput.

”Immikkut namminersuutigalugit tusagassiuserinikkut sanaartorlugit suliat” aalajangersakkap uiggiutaasa aappaanniitoq, § 3, nr. 4-mi nassuiarneqarneratut paasineqassaaq.

Imm. 3-mut

Aaqqissuussaq atorlugu tusagassiorfimmik namminersortumik pioreersumik allannguissamik piorsaanissamilluunniit aaqqissuussamik pilersaarusiortuni suliniutitut siunertallit tapiissuteqarfigineqarsinnaapput.

”Allannguissaq” niuerfigisami pioreersumi pissutsinut naleqqussaanertut paasineqassaaq.

”Inerisaaneq” nutaaliortuni siunissami niuerfigiумаakkamut naleqqussaalluni allannguinermik paasineqassaaq.

Allannguneq inerisaanerlu tamatigut pisarpoq sanaartornermik attassiniarnermik, pitsanngorsaanermik aaqqissuisoqarfimmiillu saqqummersitassanik ingerlatitseqqeriaatsimik imaluunniit atortorissaarutitut nutaanut nunallu ataqatigiinnermut atortuinit, tusagassiorfiit imarisaminnik ingerlatitseqqiffittut atugaannut naleqqussarneq allannguinerulluni.

Inerisaaniarluni suliniutitut tusagassiorfimmut pingaaruteqartutut inissisimasariarpoq, piffissap tapiissuteqarfigineqartup qaangiunnerani, suliniutip naammassineqarnermigut siunissami ungasinnerusumi tusagassiorfimmut sunniuteqarnissaa naatsorsuutigineqassammat.

Inerisaaniarluni suliniutitut sarsuatitanik nipitalinnik akullit aamma tapiissuteqarfigineqarsinnaapput, aatsaalli suliniut imarisamigut pingaarnertut internetikkut allaaserisaqarnikkut saqqummersartumut attuumassuteqarpat.

Imm. 4-mut

”misissueqqaarneq” paasineqassaaq, tusagassiorfiup suliffeqarfittut toqqammavigiумаagaanik misissueqqaarneq imaluunniit paasiniaaqqissaarneq, ilaliullugu suliap iluarsaallugu pilersaarusiap sunniutigisinnaasaa imminullu akilersinnaanera.

Imm. 5-imut

Aalajangersagaq isigineqassaaq sulianut iluarsaallugit pilersaarusiortuni tapiissuteqarfiginninnerit qanoq atugassiissutigineqarnerannut ammut killiliinertut. Aalajangersakkap erseqqissarpaa tapiissutaasoq naliginnaasumik sanaartornermut tapiissutitut pissuseqalissanngitsoq ingerlatsinermut tapiissutitut isikkoqalerluni. Tamaammat suliassat iluarsaallugit pilersaarusiortuni tapiissuteqarfigineqarsinnaanngillat, qinnuteqartup suliffeqarfiata naliginnaasumik ingerlanneqarneranut tunngassuteqartutut isikkoqarpata.

§ 6-imut

Aalajangersakkap qulakkeertussaavaa, tusagassiorfiit namminerisaminnik aningaasaateqarnissaat una inatsit naapertorlugu tapiissutigineqartut saniatigut. Assersuutigalugu eqqaaneqarsinnaavoq namminerisamik aningaasaliissuteqarneq, tapiissuteqaatit allat assingusulluunniit atorlugit aningaasaliissuteqarneq.

Suliamut iluarsaallugu pilersaarusiamut tapiissuteqarfigineqarsinnaasumut, 70 %-imik aningaasat atugassatut missingersuussat iluanni suliamut iluarsaallugu pilersaarusiamut tapiissuteqarsinnaanermut sinaakkusiineq paasigallakkat naapertorlugit naliliinermik tunngaveqarpoq.

§ 7-imut

Aalajangersakkami nr.1-ip qulakkeertussaavaa, tusagassiorfiup nalliuteqqittartunik aalajangersimasunillu amerlassusilinnik saqqummiussaqaartarnissaa. Tusagassiorfinnut internetikkut tusagassiorfiusunut isumaqarpoq ukioq naallugu ullut tamaasa iluarsaassisarnissaq nutaarsiassaqaartuarnissarlu.

Minnerpaaffigitamik aalajangersaaneq pineqarpoq, tusagassiorfiullu namminerisaminik killeqanngitsumik saqqummersitat nutarterinerillu amerlisissinnaavai.

Nr. 2-mi aalajangersakkami pineqarpoq, tusagassiorfiup saqqummersitai nunatsinni sumiikkaluaaraanniluunniit saqqummersitanut taakkunungarpiaq akigititat assigiinnissaat. Nutaarsiassaleraluni tusagassiorfiup nuna tamakkerlugu piumaneqartuunissaa piumasagaatigineqanngilaq.

Internetikkut allaaserinnilluni tusagassiorfiup taamatorpiaq assigiiaammik periarfissiinikkut atugassinneqassapput, atuisut nunap immikkoortortaani sumiikkaluarpataluunniit. Tassunga atatillugu naatsorsuutaavoq atuisup nammineerluni atortutigut tuniniaalluni attaveqaatitigut aaqqissuussamut, tusagassiorfiup atugaanut appakaassinnaanissani aaqqiivigereersimassagaa.

Piumasagaat tusagassiorfinnik ingerlatsisut atuisuminnut eqimattanut aalajangersimasunut akigititanut ilanngartuiffinissinnaanerat akornutaanngilaq, assersuutigalugu ilinniartunut, tusagassiuutinik pisartagaqalerlaanut imaluunniit assigisaannut. Akigititanik ilanngartuineq nunap immikkoortuinik assigiinngisitsinertaqaqqusaanngilaq, piffissami aalajangersimasumi piseqqusaarinnernut ilaatinneqanngippat. Taamatut piseqqusaarisoqarsinnaavoq assersuutigalugu piffissami sivikitsumi, assersuutigalugu festivalimi imaluunniit illoqarfimmi ataatsimi sapaatit akunnerini pingasuni. Kisianni naliginnaasumik pisartagaqarnermut assigiinngitsunik immikkoortiteraluni akiligassiisoqarsinnaangilaq assersuutigalugu Kalaallit Nunaanni isorliunerusuni imaluunniit illoqarfimmi tusagassiuutinik pisartagallip najugaqarnera najoqqutaralugu. Tassunga atatillugu nassiussuinnut aningaasartuutit tusagassiuutinut pisartagaqarluni akiliummut ilaatinneqartussaasutut isigineqarpoq.

Nr. 3 naapertorlugu tapiissusiisoqarsinnaangilaq, suliaq iluarsaallugu pilersaarusiaq piviusunnngortinneqarsinnaanginnera ersarivissumik takuneqarsinnaappat. Sulianut iluarsaallugit pilersaarusiaq tusagassiorfinnik nutaanik pilersitsiniarnernut attuumassutilinnut tapiissusiissuteqarfigineqarsinnaangillat, ersarivissumik takuneqarsinnaangippat tusagassiorfimmik ingerlalluarsinnaasumik suliap iluarsaallugu pilersaarusiap aallarniissutaasinnaanera.

Nr. 4 siunnersuutip §3, imm.2-anut ataqtigigitillugu isigineqassaaq, tapiissuteqaatinullu piumasagaatitersuisoqarsinnaalissalluni. Aalajangersakkamut nassuiaatit innersuutigineqarput.

§ 8-mut

Imm. 1-imut

Aalajangersakkap, suliamut iluarsaallugu pilersarusiukkamut ataatsimut qasseriarluni tapiissusiisoqartassasanersoq aalajangersarpaa. Tapiissuteqarfigineqarnissamut periarfissamik ilasinermut pissutaavoq, suliat iluarsaallugit pilersaarusiap ilaatigut ukiuni arlalinni piviusunnngortinniarneqartarnerat, suliallu iluarsaallugit pilersaarusiap naammassiniarnerinut tapiissuteqarfigeqqinneqarnissaat pisariaqartinneqartarmat.

Imm. 2-mut

Aalajangersakkap siunertarivaa ataatsimiititaliaq tapiissutinik agguaaassisartoq tikkuutissallugu, suliat iluarsaallugit pilersaarusiap sorliit qinnuteqartumik pingaaruteqarnerusutut inissimatinneqarnersut. Ataatsimiititaliap nammineq piumasutsimik pingaarnerutitanik sanioqqussisinnaaneq aalajangersinnaavaa, ataatsimiititaliap tunngavilersuutissartaqartikkuniuk.

§ 9-mut

Imm. 1-imut

Aalajangersakkami aalajangiunneqarpoq, ataatsimiititaliaq Naalakkersuisunik pilersinneqartoq, suliaq iluarsaallugit pilersaarusiaq qinnuteqaatinik suliarinninnissamik aalajangiiffiginissamillu piginnaatitaaffeqassasoq. Ilutigalugulu aalajangersakkap aalajangerpaa, ataatsimiititaliaq ukiumut ataasiarluni ataatsimiinnermini tapiissuteqaatinik suliarinnillunilu agguaaassinissamik aalajangiisassasoq. Ataatsimiititaliap qanoq katiterneqarnissaa § 10-mi aalajangersaavigineqarpoq.

Imm. 2-mut

Naalakkersuisut sulianik ingerlatsinissamut maleruagassiinerannut pissutaavoq, tapiissuteqartarnermut aqqissuussamik pisortaqarfittut ataatsimiititaliamilu allaffissornikkut ingerlatsineq Naalakkersuisunik nakkutigineqarmat. Naatsorsuutigineqassaaq, sulianik

ingerlatsinermut maleruagassiinissaq pissasoq ataatsimiititaliamik tamanna pillugu oqaloqatigiissuteqareernikkut.

Imm. 3-mut

Uani pineqarpoq inaarutaasumik aalajangersaaneq ataaseq (endelighedsbestemmelse-aalajangersagaq eqqartuussisutigut misiliisinnaanermik killiliisoq), isumaqartoq pisortatigoortumik maalaarutigineqarsinnaanngitsoq.

Inaarutaasumik aalajangersaanerup tunngavigivaa, ataatsimiititaliap agguaassisartup suliatigut immikkut ilisimasaqassuseq qinnuteqaatinik nalilersuinissamut pisariaqartoq kisimi tigummissarimmagu. Aalajangersagaq isumaqanngilaq eqqartuussivinni naliliisitsisinnaaneq killilerneqartoq.

Imm. 4-mut

Naalakkersuisut ataatsimiititaliamik allattoqarnikkut tapersiinissaat pissusissamisoortutut isigineqarpoq. Allattoqarnikkut naliginnaasumik suliaqarnerit, ataatsimiinnissanut piareersaasiornerit naammassinninnerillu, sulianik nangitsinerit qinnuteqaatillu tiguneqarsimasut ataatsimiititaliamut saqqummiussassanngorlugit isumaginninneri allattoqarnikkut tapersiinerup suliassartarivai.

§ 10-mut

Imm. 1-imut

Aalajangersakkap ataatsimiititaliap agguaassisartuusup qanoq katiterneqarnissaa aalajangersarpaa.

Inuit piukkussatut innersuutigineqartut innersuutigineqarnermikkut pisussaatitaapput aalajangersakkami piumasaqaatit aalajangersaagaasut malillugit ilaasortamik piukkunnaatilimmik toqqaanissamik.

Imm. 2-mut

Aalajangersagaq ataatsimiititaliami ilaasortanut piumasaqaatinik aalajangersaavoq. Piumasaqaatinut patsisaavoq qulakkeerniarlugu ilaasortat inersimalereersutut nammineersinaallutik ukioqarnissaat, aammalu ilaasortat ataatsimiititaliami ilaasortaanerminnut atatillugu politikkikkut suliaqarnermikkut imaluunniit suliffeqarnermikkut soqutigisatigut akerleriittumik inissittoorsinnaannginnissaat qulakkeerniarlugu.

Imm. 3-mut

Aalajangersakkap ataatsimiititaliap piffissaq atuuffigisassaa aalajangersarpaa. Piffissaq atuuffiusussaq ukiunut marlunnut aalajangerneqarpoq ingerlaannartumik ataatsimiititaliami nutarsaajuartoqarnissaa qulakkeerumallugu. Toqqarneqaqqissinnaanermut aalajangersakkami

immikkoortumi kingullermiittumi aamma ataatsimiititaliap aalajaatsumik pissuseqarnissaa periarfissinneqarpoq.

Siunnersuutip § 24, imm. 3-annut innersuussineq ikkunneqarpoq ikaarsaarnermut aalajangiussaq maluginiarneqaqqullugu, tassani pineqarami tapiissutinik agguaassisarnernut ataatsimiititaliap ivertinneqareersimasup atuuffiata sivisussusaa. Tamatumalu kingunerissavaa 1 oktober 2017-imiik agguaassinernut ataatsimiititaliap atuutilertussaasup ilaasortai toqqartorneqassammata.

Imm. 4-mut

Ilaasortat akissarsiaqartinneqarnissaat akissarsiaqartitsinermut inatsit naapertorlugu ersarissumik nalunaarsorneqassasoq pissusissamisoortinneqarpoq.

§ 11-mut

Imm. 1-imut

Aalajangersakkap suliassanut iluarsaallugit pilersaarusiukkanut tapiissutinik qinnuteqartarnermut killiliussaasoq aalajangersarpaa. Killiliussaq aalajangiunneqarpoq qinnuteqaatinik isumaginninnissaq aalajangiiffiginninnissarlu piniassammat ingerlatsinermut tapiiffigitinnissamut qinnuteqaatinut killigititaq nallertinnagu.

Imm. 2-mut

Aalajangersakkamut tunngaviuvoq, suliassatut iluarsaallugit pilersaarusiat tamarmik immikkut pilersaarusiatut isigineqarneri. Aalajangersakkap siunnersuummi § 8, imm. 2-ata aalajangersakkamut aamma attuumassuteqarnera maluginiarneqassaaq, aalajangersaavigineqarmat tusagassiorfik ataaseq ukiumi qinnuteqarfiusumi, sulianut iluarsaallugit pilersaarusianut arlalinnut tapiiffigineqarnissamik qinnuteqassaguni, qinnuteqaatit pingaarnersiorlugit tulleriarneqarneri tunniunneqartussaammata.

Imm. 3-mut

Aalajangersakkap qinnuteqaammi suut ilanngunneqassanersut aalajangersarpaa.

Peqqissaarluni annikitsortanik saqqumiilluni suliamik allaaserinnissamik nr.1-imi piumasagaat ilanngunneqarpoq suliassap qinnuteqaatigineqartup piumasagaatit naammasisimanerai tamakkiisumik toqqammavissaqarluni naliliisinaanissaq anguniarlugu. Suliassap allaaserineqarnerani ersittussaavoq pilersitsiniarluni imaluunniit inerisaaniarluni suliniutaanersoq.

Nr. 2-mi aningaasatigut missingersuummut aningaasalersuinissamillu pilersaarummut piumasagaat tunngasoq siunnersuutip § 6 aamma § 7-ip, nr.3-anut attuumassuteqarpoq.

Nr. 3-mi naatsorsuutit ukioq ilivitsoq siulianeersut pillugit piumasaqaat tapiiffigineqarnissamut piumasaqaatinut § 7, nr.3-mi aamma § 8, imm. 1-imiittunut attuumassuteqarpoq.

Qinnuteqarnermut atatillugu pappialaatit § 13 naapertorlugu kukkунersiorneqarsinnaapput.

§ 12-imut

Imm. 1-imut

Aalajangersagaq piumasaqaammik naatsorsuutit atsioreersimasat nassiunnissaannik aalajangersaavoq. Naatsorsuutit pillugit piumasaqaat ikkunneqarpoq tapiissutigineqartut siunertamut akuersissuteqarfigisamut atorneqarsimani upernarsarniarlugu.

Qaammatinik pingasunik periarfissiineq ilanngunneqarpoq suliap nammasineqarnerata kinguninnguatigut naatsorsuutit suliarineqareerlutik nassiuneqarnissaat qulakkeerniarlugu.

Imm. 2-mut

Aalajangersakkap, annertunerusumik tapiissuteqartoqarsimatillugu, kukkунersiuisumik pisortanit akuerineqartumik kukkунersiuisoqarnissamik piumasaqaat, aalajangersarparaa. Killigititaq 150.000 koruuninut inissinneqarpoq. Piumasaqaat ilanngunneqarpoq suliat annertuumik tapiissuteqarfigineqartut naatsorsuutitaat uppernartuunissaat qulakkeersimaniarneqarmat.

§ 13-imut

Imm. 1-imut

Aalajangersakkap kukkунersiuiunerup ingerlanneqarnissaanut pingaarnerutillugit piumasaqaatit aalajangersarparai. Oqariaaseq ”kukkунersiuiinermit ileqqorissaarnissaq naapertorlugu” naliginnaasumik atorneqartuuvoq qanoq ilisukkulluunniit isumaa naapertorlugu paasineqartussaalluni.

Kukkунersiuiinermit ileqqorissaarneq maani pineqartumi isumaqarpoq, kukkунersiuiunerup takutittussaagaa qanoq eqqortigisumik sukkatigisumillu suliassat qanoq issusaasa periarfissaqartissagaat. Kukкунersiuisoq innarlerneqarsinnaannginnermik takutitsisinnaanera, kinaassusersiortuunnginneq, isertuussisinnaaneq, sulianut pikkorissusilimmik pissuseqarneq sulianut tamakkiisumik piginnaaneqassuseq pisariaqartitamillu qajassuarluni suliakkiussanik isumaginnissinnaanermittaaq imaqarpoq.

Imm. 2-mut

Piumasaqaatit immikkut ittut aalajangersakkap, kukkунersiuiinermit suut misileqqinneqartassanersut aalajangersarparai.

Tapiissuteqaatip siunertaminut atorneqarsimaneranik naliliinermi, kukkunersiuisup siullerpaajutillugu tapiissuteqarnikkut akuersissutaasup imarisai suliallu piviusunngortinneranut naleqqersuineq aallaavigissavaa. Pissutsit qanoq inneri apeqqutaatillugit qinnuteqaasiaq suliamullu iluarsaallugu pilersaarusiartaata allaaserineqarnera aamma matumani ilanngunneqarsinnaalluni.

Tapiissuteqarnerup piunasaqaatitaanik naammassinnissimanerup nalilerneqarnerani, kukkunersiuisup inatsisip aalajangersaaneratigut tapiissuteqarnikkut akuersissutaasut piunasaqaataasimasinnaasullu isummerfigisinnaasariaqassavai.

Imm. 3-mut

Aalajangersakkap Naalakkersuisut pisussaattippai taamungaannaq misiliinikkut tigooqqaalluni naatsorsuutiniq misissuisarnissaat. Aalajangersakkap siunnersuutip nakkutilliinissamut tunngasunik aalajangersagartaanut attuumassuteqarnera isiginiarneqassaaq. Taamaammat agguaassinermi ataatsimiititaliaq, siunnersuutip § 21 naapertorlugu tapiissutiniq tunineqartup tapiissutiniq atuineranik nakkutilliisussaavoq. Naalakkersuisunit taamungaannaq misiliinikkut tigooqqaalluni misissuineq taamaalilluni agguaassinermut ataatsimiititaliap allattoqarfiatiguulissaaq.

§ 14-imut

Imm. 1-imut

Aalajangersakkap, tapiissutit tunniunneqartut 150.000 koruunit ataallugit annertussussillit kukkunersiorneqarnissamik piunasaqaatitaqaatitaqannginneri aalajangersaavigivaa. Tamanna imm. 2-mut attuumassuteqarnera takuneqassaaq, tassani aalajangersarneqarmat tapiissutiniq tiguisoq atsiornermigut uppersaassasoq naatsorsuutit eqqortuunerannik tapiissutillu siunertamut atorneqarsimanerinit.

Kukkunersiuiinissamik piunasaqaateqartoqanngippat tunngaviuvoq, tapiissuteqaatit annertussusaat isigalugu pisariaqanngitsutut isigineqartoq, sulianullu allanut naleqqiullugit annertunngitsunut tapiissuteqarfigineqartoq kukkunersiuiinermut aningaasartuutiniq nammakkersorneqartariaqanngimmatsoq.

Imm. 2-mut

Aalajangersakkap, imm. 1 naapertorlugu 150.000 koruunit ataallugit tapiissusiisoqarneratigut kukkunersiuisoqarnissamik piunasaqaateqartoqannginneranut attuumassuteqarnera isiginiarneqassaaq.

Naalakkersuisut isumaqarpata naatsorsuutit eqqortuunnginnerannut imaluunniit tapiissutigineqartut siunertamut atorneqarsimannginnerannut pasilliinissamut patsisissaqartoq, tapiissutiniq tiguisoq tamanna pillugu paasissutissanik noqqaavigineqarsinnaavoq. Tamanna erseqqissumik siunnersuutip § 21, imm. 2-mi takuneqarsinnaavoq. Taamatullu aamma § 22, imm. 2-mi agguaassinernut

ataatsimiititaliaq tamakkiisumik ilaannakortumilluunniit tapiissutininik utertitseqqusilluni piumasaqarsinnaasoq erseqqarissumik allaqqavoq, assersuutigalugu tapiissutininik tiguisisoq paasissutissanik tapiissutinut attuumassuteqartuninik tunniussinissamut pinaasersimappat, uanilu pineqarput naatsorsuutit suliamullu nalunaarusiorluni immersuivissat immersoriikkat.

Imm. 3-mut

Aalajangersakkap siunertarivaa, tapiissutininik tiguisisup qanoq annertutigisuninik tapiissuteqarfigineqarsimanerata tamakkiisumik takuneqarsinnaanissaa. Tamanna pingaaruteqalersinnaavoq utertitsilluni akiliisoqarnissamik piumasqaateqartoqalissagaluarpat, paasineqarpallu tapiissutininik tiguisisoq suliamut qinnuteqaasiornermi missingersuummut sanilliullugu suliamut atuinikinnerusimasoq, tak. § 22, imm. 2 nr.5.

Imm. 4-mut

Aalajangersakkap siunertarivaa Naalakkersuisut periarfissalerneqassasut, suliap ilusilersorlugu pilersarusiap naammassineqarneranut paasissutissaninik ilassutaasuninik ilusilersorluarluginik suliarineqartuninik tunniussivigineqarsinnaalersilluginik. Tamannalu naatsorsuutinut ilassutitut isigineqassaaq. Immersugassap assersuutigalugu imarisinnaavai suliniutip iluani suninik ingerlataqartoqarsimanersoq, kikkut suliniummuteq ilaasimanersut suliniutillu pilersitaaninik naliliinera, ilaalu ilanngulluginik.

§ 15-imut

Aalajangersakkap aalajangersarpaa, ingerlatsinermuteq tapiissusiisarnermi siunertatut pingaartinneqarmat, paasissutissaninik naliginnaasumik inooqatigiinnermuteq tunngasuninik tusagassiutitiginik naqitatiginik ingerlatitsinerup siuarsarnissaata sunniuteqarfiginissaa. Inuiaqatigiinninik naliginnaasumik qaammarsaaniarneq inooqatigiinnermi pingaarutilerujussuurtut isigineqarpoq, inuiaqatigiinnilu paasissutissaninik ingerlatitsiffiusuni toqqammavittut pingaarutilittut isigineqarluni.

Aamma siunertaavoq inuit akornganni killilersugaanngitsumik isummersorsinnaaneq anguniarneqassasoq tusagassiorfiup saqqummersitai tunuliaqutaraluginik.

Tapiissusiisarnernup nuna tamakkerluginik naqitanut saqqummersartunuinnaq tunngassuteqarnera oqaatigineqassaaq.

Tusagassiorfiup nuna tamakkerluginik saqqummersartuunera isumaqarpoq, nuna tamakkiivilluginik saqqummersartuunissaa, tamanna siunnersuutip § 16, nr. 1-imi erseqqissaatigineqarpoq.

”Tusagassiutit naqitat” siunnersuutip § 2, imm. 4-mi nassuiaatigineqarput.

§ 16-imut

Aalajangersakkap, ingerlatsinermut tapiissuteqarnissamut piumasaqaatit immikkoortiterlugit aalajangersarpai.

Nr. 1-imi aalajangersassallugu tulluartinneqarpoq, tusagassiorfik naqitanik saqqummersitsisassasoq. Tamatumani qulakkeerneqartussaammat, innuttaasut tamarmik teknikkikkut atortorissaarusunnigikkaluarlutik tusagassiummik atuisinnaanermik periarfissinneqarnissaat.

Tusagassiutip minnerpaamik qaammammut ataasiarluni saqqummersartuunissaata aalajangersaavigineqarnerata qulakkeertussaavaa nutaarsiassanik ingerlaannartumik tunniussuinissaq, taamaalilluni inuttaasut maanna pisunik pissarsisinnaanerat annertusarneqassaluni.

Aalajangersagaq minnerpaatitaaffissanik aalajangersaasuvoq, tusagassiorfimmik tapiissuteqarfigineqarsinnaanngitsitsinnigilaq, assersuutigalugu saqqumersittagai internetikkoortunik ilaqartinneqarpata, imaluunniit naqitamik qaammammut ataasiaannarani saqqummersitsisaruni. Innuttaasut sumiluunniit najugaqaraluarlutik nutaarsiassaqaartinneqarnissaat siunertarineqarpoq, taamaamallu tusagassiorfiup nuna tamakkerlugu saqqummersitsisarnissaa piumasaqaatit aalajangiiffigineqarpoq.

Nr. 2-mi aqutsinermi eqqumaffigisassat peqcutigalugit tapiiffigineqarnissamik qinnuteqaatit qinnuteqarnissamut killiliussa qangiutsinnagu tiguneqareersimassapput. Qinnuteqaatit killiliussaasup qangiutereerneratigut tiguneqartut tapiissuteqarfigineqarsinnaanngillat.

Nr. 3-mi aalajangersakkap Naalakkersuisut aningaasat ingerlatsinermut tapiissutigineqartut atorneqarnerinik nakkutilliisinnaanerat qulakkeertussaavaa.

”Pisariaqartitamik takussutissiinissaq” paasineqassaaq, naatsorsuutit kukkunersiuisumik atsiorneqarsimasut saniatigut paasissutissat pappiaqqatigoortut, aningaasat ingerlatsinermut tapiissutigineqartut tamakkerlugit pissusissamisoortumik atorneqarnerinut uppernarsaatit takussutissiissutigineqartut piumasaqaat naapertorlugu.

§ 17-imut

Imm. 1-imut

Ingerlatsinermut tapiissutinik qinnuteqaatinik piffisaq eqqorlugu tunniussivissaq ukiup ilivitsup naalernerani pisussanngorlugu inissinneqarnera pissusissamisoortutut isigineqarpoq, taamaalilluni tapiissutigineqartut annertunersaasa atorneqarneri qinnuteqaatip tunniunneqarnerata nalaani takussutissartaqarniassammata.

Imm. 2-mut

Aalajangersakkap qinnuteqaatit isikkussaannik qinnuteqaatillu imarisassaattut piunasaqaatit sukumiinerusumik nalunaarsorneqarsimasut aalajangersaavigivai.

Qinnuteqaatip nalilersorneqarsinnaanissaanut tapiissuteqarfigineqarsinnaalernissamullu piunasaqaatit pisariaqartut pineqarput.

Tapiissuteqarfigineqarnissamut piunasaqaatit naammassineqarsimaneranut takussutissat, tapiissuteqarfiginnittarnerni ataatsimut piunasaqaatinut, piunasaqaatinullu immikkut aalajangersakkanut naleqquttussaapput.

Saqqummersitat amerlassusissaannut takussutissiinissamik piunasaqaat siunnersuummi § 18-imut attuumassuteqartutut isigineqassaaq, tassani ingerlatsineranut tapiissutit tunniunneqartassammata tusagassiorfiit immikkuutitaarlutik ukiumi tapiissuteqarfiusumi saqqummersitaasa amerlassusaat ukiumi tapiissuteqarfiusumi saqqummersitat amerlassusaasa katinerneranut naleqqiunnerisigut.

Imm. 3-mut

Aalajangersakkap Naalakkersuisut periarfissippai, tapiiffigineqarsinnaanissamut piunasaqaatinik naammassisaqarnernierneranut paasissutissanik attuumassutilinnik annertunerusunik piunasaqarsinnaatillugit. Tassani takussutissat, imm. 2-mi piunasaqaatigineqartut, saniatigut pineqarput.

§ 18-imut

Imm. 1-imut

Aningaasanut inatsimmi ingerlatsineranut tapiissutip aningaasanut agguaassassanut marluusunut avinneqarsinnaanerat pissusissamisoortinneqarpoq. Agguaassassat aappaat tusagassiuutitut sapaatip akunneranut ataasiarluni arlaleriarluniluunniit saqqummersartunoorpoq. Agguaassassat aappaat tusagassiuutitut sapaatip akunnikkaartumik akuttunerusunik akulikinnerpaamilli qaammammut ataasiarluni saqqummersartunoorpoq.

Inatsisartut Aningaasanut Inatsimmik akuersineranut atatillugu aningaasaliissutit qanoq amerlatigisut agguaassassanut marluusunut agguarneqartassanersut aalajangiiffigisassavaat.

Imm. 2-imut

Aalajangersakkap, tapiissuteqaatit qanoq agguaanneqassanersut aalajangersarpaa.

Aalajangersakkami siunertarineqarpoq tapiissuteqaatit akuersissutaasut annertussusilernerneqartassasut ukiumi tapiissuteqarfiusumi saqqummersitat, tapiissuteqarfigineqarnissamut piunasaqaatinik naammassinnissimasut, annertussusaat naapertorlugu. Taamasilluni aningaasanut agguagassanut marluk qinnuteqarpata, qinnuteqartoq

siulleq 52-inik saqqummersitaqarsimaguni aappaalu 26-nik saqqummersitaqarsimalluni, siulliup akuersissutit aningaasat agguagassat 2/3-ii pissavai aappaatalu akuersissutit aningaasat agguagassat 1/3-ii pissallugit.

Imm. 3-mut

Aalajangersakkap ersersipaa pissusissamisoortutut isigineqartoq, tapiisutigisassatut akuersissutitip tamakkerlugu atorneqarnissaa qanorluunniit amerlassusilinnik qinnuteqaateqartoqaralarpat.

Ukiut ilaanni aningaasanik agguagassanut arlaannut qinnuteqartoqassanngikkalarpat, agguagassat marluusut aningaasanut inatsimmi aningaasaliissummit ataatsimeersuummata, agguagassap aappaanut aningaasanut inatsimmi suleriaatsitut agguagassat aappaannut nuussisoqarsinnaavoq tassanilu atuisoqarsinnaalluni.

§ 19-imut

Pineqartoq tassaavoq inaarutaasumik aalajangiisarneq, tamannalu isumaqarluni aalajangerneq allaffissornikkut maalaarutigineqarsinnaanngitsoq.

Inaarutaasumik aalajangiisarneq tunngavilerneqarpoq pineqarmat aaqqissuussineq kinaassusersiunngitsumik tunngavilimmik suliaammat. Taamaattumillu pisariaqartinneqanngilaq immikkut allaffissornikkut maalaartarfeqarnissaa. Aalajangersagarli isumaqanngilaq suliap eqqartuussivitsigut misilinneqarsinnaanera killilerneqartoq.

§ 20-mut

Imm. 1-imut

Aalajangersakkap aalajangersarpaa, Naalakkersuisut tapiissuteqartarnermut aaqqissuussaq aqutsisoqarnikkut isumagisassarigaat agguaaassisarnermut ataatsiimititaliamut allattoqarfiumikkut. Tamanna ilaatigut isumaqarpoq, Naalakkersuisut tapiissuteqartarnermut aaqqissuussaq pillugu paasissutissiisassasut, aqutsisoqarnikkut suleriaatsinik ilannguttariaqarsinnaasunik aalajangersaallutik, qinnuteqaatit tigullugit taakkuninngalu agguaaassisarnermut ataatsiimititaliamut saqqummiussassanngorlugit suliarinnillutik.

Imm. 2-mut

Aalajangersakkami siunertarineqarpoq, paasissutissat tapiissuteqarfigineqarnermut toqqammaviusut malunnaatilimmik allannguutaat pillugit tapiissutinik tiguisup Naalakkersuisunut nalunaarutiginnittusaaanermik pisussaaffilerneqarneranik. Tamanna siunnersuutip § 22, imm. 1-imut atasutut isigineqassaaq, agguaaassinernullu ataatsiimititaliap tamanna malillugu aningaasanik tapiissutaasunik tunniussinissaq unitsissinnaavaa, tapiissuteqarnissamut toqqammaviusoq atorsinnaajunnaartutut naliliiffigineqarpat. Assigisaanik agguaaassinernut ataatsiimititaliaq tapiissutit

akuerineqartut tamakkiisumik ilaannakortumilluunniit utertinneqarnissaannik piumasagaateqarsinnaavoq, tapiissutininik tiguisisup assersuutigalugu tapiiffiqarsinnaanermut piumasagaatit naammassisinnaajunnaarpagit, taamatullu suliassanik naatsorsuutaasunik naammassinissinnaanngippat.

§ 21-mut

Imm. 1-imut

Aalajangersakkap agguaassinernut ataatsimiititaliaq pisussaatippaa suliassanut ilusilersorlugit pilersarusianik nakkutilliinissamik. Nakkutilliineq agguaassinernut ataatsimiititaliap allattoqarfatiqoorluni pissaaq. Tapiissutininik agguaassinernut ataatsimiititaliap tapiissutininik agguaassineq akisussaaffigimmagu, pissusissamisoortutut isigineqarpoq ataatsimiititaliap aamma aaqqissuussamik nakkutilliisuunissaa.

Imm. 2-mut

Aalajangersakkakut agguaassinernut ataatsimiititaliaq periarfissinneqarpoq nakkutilliinerminut atatillugu tapiissutininik tiguisisumit paasissutissanik pisariaqartunik piumasagarfiginnissinnaatinneqartoq. Tamanna ataatsimiititaliap allattoqarfatiqoorluni pisassaaq.

§ 22-mut

Imm. 1-imut

Aalajangersakkap aalajangersarpaa, agguaassinernut ataatsimiititaliap tapiissuteqarnernik unitsitsinnaasoq, tapiissuteqarnermut toqqammaviusoq atorsinnaajunnaarpat. Peqqutaasinnaavoq tusagassiorfiup saqqummersitaasa minnerpaamik qaamammut ataasiarlutik saqqummiissaarnerisigut, imaluunniit piumasagaatit tapiissuteqarnermut attuumassuteqarsinnaasut malinneqanngitsoornerisigut.

Imm. 2-mut

Aalajangersakkap aalajangersarpaa, qanoq pisoqartillugu agguaassinernut ataatsimiititaliaq tapiissutininik akuersissutigineqartunik tamakkiisumik ilaannakortumilluunniit utertitsinissamik piumasagaateqarsinnaasoq. Pissutsit eqqaaneqartut agguaassisarnermut ataatsimiititaliap nakkutilliineranut atatillugu tapiissutininik tiguisisup naatsorsuusiaasa mississorneqarnerisigut paasineqarsinnaapput.

§ 23-mut

Imm. 1-imut

Aalajangersakkap, ingerlatsineranut tapiissutininik qanoq atuineranik, tapiissuteqartarnernut maleruagassat eqqortumik maleruarneqarnerinik tapiissuteqarnermilu piumasagaataasinnaasunik

allanik nakkutilliisusaaq kinaanersoq aalajangersarpaa. Nakkutilliisutut suliap Naalackersuisunut inissinneqarsimaneranut peqqutaavoq, Naalackersuisut ingerlatsineranut tapiissutitut tunngassutilinnik suliaqartuummata aalajangiisartuullutillu.

Imm. 2-mut

Aalajangersakkap Naalackersuisut nakkutilliineramik ingerlatsinermik tapiissutitut tiguisumut paasissutissanik pisariaqartitanik noqqaavinnissinaanermik periarfissippai.

§ 24-mut

Imm. 1-imut

Aalajangersakkap piffissaq atuutsitaalerfiusoq aalajangersarpaa. Tamatuminnga aalajangiinerup patsisigivaa atuutsitaalerfiusup siusinnerpaamik ukiup ilivitsup aallartinnerani pinissaa kissaatigineqarmat, tapiissusiisarnernut aaqqissuussat qaammatsiutit ukiuat naapertorlugu ingerlammata.

Imm. 2-mut

Aalajangersakkap aalajangersarpaa, tusagassiorfinnut tapiissuteqartarnernut maleruagassat maannamut atuuttuusut inatsisip atulersitaanera ilutigalugu atorunnaarsitaassasut. Tamanna pissaaq, maleruagassat maannamut atuuttuusut inatsimmik taarserneqarnissaat siunertarineqarmat.

Imm. 3-mut

Aalajangersagaq ikaarsaariarnissamut aalajangersagaavoq. Aalajangersaavigivaa, tusagassiorfinnut tapiissuteqartarnerit pillugit nalunaarussiaq maannamut atuuttuusooq naapertorlugu aalajangersaavigineqarsimasup agguuassisarnernut ataatsimiititaliap ilaasortaasa piffissaq atuuffigisartik 30. september 2017 tikillugu ingerlatissagaat. Tamanna piffissami aalajangersimasumi toqqakkatut ilaasortaanerannut naleqquppoq. Tamatumuunalu pissusissamisoortutut isigineqarpoq, ataatsimiititaliap ivertinneqareersimasup piffissap aalajangersimasup toqqagaaffigalugu atuuffigisami qaangiunnissaata tungaanut suliasani nakkutigissagai.